

### He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



### He whakarāpopoto

Pānuitia te whakarāpopoto ki te ākonga. Ka aha a Tama-nui-te-rā?

### He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te ingoa o te pukapuka. I roto i ngā pikitia katoa kei muri iho a Tama-nui-te-rā. Kei mua ake ko tētahi whānau e mahi ana i ngā mahi o ia rā, o ia rā. Ko te kaupapa o tēnei pukapuka, he tirohanga i tikina atu i Te Ao Māori e kīia ana ko Tama-nui-te-rā e huri ana i a Papa-tū-ā-nuku. Kei Te Ao Pūtaio, ko Papa-tū-ā-nuku e huri ana i te rā.

### He Matapaki

#### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei:
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuetanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
  - te whakatenatena i te ākonga ki te titiro ki mua, ki te matapai hoki, i te wā o te whakataki.

### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

### He whakapuaki māramatanga

1. He aha te kaupapa o tēnei pukapuka?
2. He aha te mahi a Tama-nui-te-rā?
3. Ka aha a Tama-nui-te-rā?
4. Ina ua te ua he ōrite te mahi a Tama-nui-te-rā?
5. Ki ōu whakaaro, he aha te wāhanga o te rā e pai ana ki a koe?

### Ngā whakautu ki ngā whakapuaki māramatanga

1. Te whitinga a Tama-nui-te-rā.
2. He whakamahana i te ao.
3. Ka moe, ka oho, ka puta, ka piki, ka whiti, ā, ka tō.
4. Ka rerekē ngā whakautu.
5. Ka rerekē ngā whakautu.

### He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

### Te pūtake

**T** He tāutu i tētahi raupapatanga.

### He whakatakinga ā-roro, he whakaharatau

I mua i te pānui i te pukapuka, matapakia te mahi a Tama-nui-te-rā. Matapakia ngā wāhanga o te rā (oho, wā kai, wā moe).

Kia oti i te ākonga te pānui, kōrerotia ngā rātaka o te ākonga. He aha ngā rerekētanga, ōritetanga rānei o ia ākonga?

He aha te mahi a Tama-nui-te-rā?  
Matapakia ngā take i pērā ai.